

Den number di Fundacion Festival di Dande: Diezun agrupacion te awor pa Festival di Dande

STA. CRUZ -- Diamars anochi a tuma lugar na Urataka Center e prome reunion pa Festival di Dande, propio composicion y tipico unda cu 11 agrupacion a registra na participacion den e anochi grandi di e festival cu lo tuma lugar diasabra 29 December den Club Caiquetio na Paradera. Manera ta conoci e festival lo ser dedica na sr. Vicente Ras di agrupacion musical tipico “Sodor y Cuero”. Durante e reunion a keda dicide cu lo reconoce dos musico mas: cual ta e hoben Omar Kock y Francisco (Choncho) Boekhoudt. Tur agrupacion mester ta bisti elegante y e cantante di Dande mester ta bacha of dasha. No ta permiti pa e cantante di Dande pone su sombre abao. E mester canta cu sombre den man, sino e ta perde punto y te hasta descualifica pasobra ta falta di respet cu despues di saludo di aña nobo, e cantante pone sombre abao. E cantante mester canta su Dande completo

cu sombre den man. No ta permiti ‘baho di coriente’.

Un total di 11 agrupacion a registra den e prome reunion: Tipico Los Amigos, Tipico Nos ta Nos, Stimami, Tipico Los Canarios, Benny y su Tipico Pocoloco, Frank Croes y su Tipico Pegasaya, Grupo di Betico, Grupo Alegre, Robert Maduro y su amigonan, Tico y su Estreyanan. Agrupacionnan cu no a registra nan participacion ainda lo por haci esaki cerca presidente di e Fundacion di Festival di Dande na telefoon 5859228. Ta deseo di e Fundacion pa no pasa 20 agrupacion y como tal ta pidi tur otro agrupacion pa yama registra na participacion. Riba e anochi grandi lo tin 4 competencia; Festival di Dande damas, cabayeros, Festival Tipico y Propio Composicion.

Diahuebs 20 di December lo tin e ultimo reunion y alavez lo numera e agrupacionnan.